



Inatsisartut

*Aningaasaqarnermut Ataatsimiititaliaq
Finansudvalget*

Ulloq/Dato: 26. august 2011
J.nr.: 01.31.06/11-00547

Naalakkersuisutmedlemmet for Finanser

Aningaasaqarnermut Ataatsimiititaliap suliaq nr. 01.31.06/11-00547 pillugu marlunngornermi ulloq 23. august 2011-mi aalajangiineranik Naalakkersuisunut ilisimatitsineq.

Nummi umiarsualivimmik containerersorfiusumik nutaamik misissueqqaarnissamut aningaasaliissutinik missingersuutitut sunniuteqanngitsumik nikisiterineq – suliassamik suliareqqiineq

Naalakkersuisut **inassutigaa**,

- kontumi pingaarnermi 87.73.10 Umiarsualiviit, aningaasaliissutit 2,633 mio. kr.-inik amerlineqassasut, agguarneranni suliassamut nr. 999.24.106 Umiarsualivinni misissueqqaarnerit, aningaasaliissutit 0,792 mio. kr.-inik ikilisillugit aammalu suliassamut nr. 060.23.005 Umiarsualivik containerersorfiusoq nutaaq, Nuuk, aningaasaliissutit 3,425 mio. kr.-inik amerlillugit
- kontumi pingaarnermi 87.73.22 GLV – Mittarfiit, aningaasaliissutit 1,185 mio. kr.-inik ikilisinneqassasut, agguarneranni suliassamut nr. 033.24.939 Narsarsuarmini talittarfiup iluarsanneqarnera, aningaasaliissutit 0,291 mio. kr.-inik ikilisillugit aammalu suliassamut nr. 120.25.024 Ilulissani mittarfik, aningaasaliissutit 0,894 kr.-inik ikilisillugit
- kontumi pingaarnermi 89.71.40 Nukissiorfiit, sanaartornermut taarsigassarsiarititat, suliassamut nr. 100.99.201 Imeqarfimmik iluarsaassineq, Asiaat, aningaasaliissutit 1,448 mio. kr.-inik ikilisinneqassasut.

Aningaasaqarnermut Ataatsimiititaliap oqaaseqaatai

Ineqarnermut, Attaveqarnermut Angallanermullu Naalakkersuisumik apersuinissaq siunertaralugu suliama matuni isummernissani kinguartinneqassasoq Aningaasaqarnermut Ataatsimiititaliap ataasinngornermi ulloq 15. august aalajangiuppaa. Apersuineq taanna marlunngornermi ulloq 23. august 2011-mi ingerlanneqarpoq. Naalakkersuisup oqaasiisa allattorsimaffiat aalajangiinnermut uunga ilanngussatut ilanngunneqarpoq.

Paasissutissat apersuineri saqqummiunneqartut tunngavigalugit suliaq ataatsimiititaliamit oqaluuserineqaqqippoq.

Tamatuma kingorna suliamik isummerfiginninnermini ataatsimiititaliaq marlunnut avippoq.

Ataatsimiititaliami amerlanerussuteqartut, Olga P. Berthelsen, Andreas Uldum aamma Juliane Henningsen isumaqarput Nummi umiarsualiviup allilerneqarnissaani misissueqqaarnerit kingulliit aalajangiisuusullu aallartinneqarnissaat pillugu aalajangiinissap pisariaqarnera apersuineri paasissutissat saqqummiunneqartut qularnaatsumik uppernarsisikkaat. Tassunga atatillugu amerlanerussuteqartut immikkut maluginiarpaat sanaassatut pilersaarummut

matumani pineqartumut Assartuinnermut Isumalioqatigiissitap sulinera kisimi tunngavigineqanngitsoq aammali suleqatigiissitap 2008-mi Naalakkersuisuusunit Nuup Kommuniusumillu pilersinneqartup pilersaarutillu imminut aningaasaqarnikkut napatissinnaasutut isigineqartup aallartinneqarnissaanik kaammattuuteqartup suliaanik annertuumik tunngaveqartoq. Tamatuma kingorna suleqatigiissitap suliaata tatiginassusia Assartuinnermut Isumalioqatigiissitamit naqissuserneqarpoq. Taamatuttaaq Nuummi umiarsualivimmik allilerinikkut umiarsualivinnik, soorlu Sisimiuni Ilulissanilu, allanik aningaasaqarnikkut imminut akilersinnaasutut ilimagineqartunik allilerinissat mattunneqassanngitsut Naalakkersuisup nassuiaatigaa. Akerlianilli Nuummi umiarsualivimmi allilerinermi periuseq atorneqartoq illoqarfinni taaneqartuni immaqalu allani siunissami pilersaarutaasussanut atorneqarsinnaasutut isigineqarpoq. Kiisalu minnerunngitsumik aktiaateqarluni ingerlatseqatigiiffimmi Nuuk Atlanthavn A/S-imi kommunip aningaasaleeqataassutissai Kommuneqarfik Sermersuumit immikkoortinneqareersimasut apersorneqarnermini Naalakkersuisup nassuiaatigaa. Taamatuttaaq Royal Arctic Line A/S-ip aamma Ålborg Havn A/S-ip aningaasaleeqataassutissanik piareersimatippaat. Ingerlatseqatigiiffimmi pilersitsineq maanna pinngippat, taamaallunilu misissueqqaarnerit ukioq manna aallartinneqanngippata minnerunngitsumik Kommuneqarfik Sermersuup pilersaarummut aningaasaqarnikkut peqataanissamut periarfissaqarnera ajornakusuulersinnaavoq, tassa aningaasaleeqataassutissani kommunip *aappaagumut* missingersuutaani kommunip aatsaat immikkoortissinnaassammagit. Taamaattumillu Nuummi umiarsualiviup 400 mio. kr.-inik akeqartussatut tagginneqartup pisortat karsiinit akiliuteqarfiumngitsumik allilerneqarnissaanik aalajangernissamut maanna periarfissatsialaanerarlugu Naalakkersuisup naliliinera amerlanerussuteqartunit paasilluarneqarsinnaavoq, tassami aktiaateqarluni ingerlatseqatigiiffiup taaneqartup aningaasalersuutissat pisariaqartut pissarsiarinissaat nammineq akisussaaffigissammagu. Nunarsuarmi aningaasaqarnikkut maanna ingerlanerliornerup aningaasalersuutissat taakku pitsaasumik atugassaqarluni pissarsiarinissaannut ingerlatseqatigiiffik periarfissikkaa Naalakkersuisup nassuiaatigaa, tamannalu qaffasinnerusumik ernialerlugit taarsigassarsiat kingusinnerusukkut taarsigassarsiarineqarnissaannut sanilliullugu umiarsualiviup sullississutaanik atuinermut naatsorsuutigineqartutut akikinnerusumik akiliuteqarnikkut umiarsualivimmik atuisunut iluaqutissiisnaavoq. Tamanna tunngavigalugu qinnuteqaat amerlanerussuteqartunit akuersissutigineqarsinnaavoq.

Ataatsimiititaliami ikinnerussuteqartut. Aleqa Hammondip aamma Finn Karlsenip qinnuteqaat akuersissutigisnaannngilaat. Ikinnerussuteqartut aallarniutigalugu erseqqissarumavaat Nuummi umiarsualiviup allilerneqarnissaanik pilersaarut matumani pineqartoq ajoriffissaqartinnginnamikkuk. Taamatut allilerinissap pisariaqartinneqarnera qularnanngilaq. Qinnuteqaatilli Assartuinnermut Isumalioqatigiissitap isumaliutissiisutaanik aallaaveqarneranik ataatsimiititaliamut qinnuteqaammuni Naalakkersuisup erseqqissaatiginninnera ikinnerussuteqartut aallaavigalugu isummertariaqarput. Naalakkersuisumik apersuinnermi paasissutissiisutigineqartut naapertorlugit isumaliutissiisut taanna nassuiaammik UKA 11-imi Inatsisartunit oqaluuserineqartussamik tapertaqartinneqarumaarpoq. Saqqummiussalli taakku suli kalaallisut piariinngillat suliaasarlu Inatsisartunit suli oqaluuserineqarani. Tunngaviummik ajornartorsiut taanna oqaatsinut politikimullu tunngassuteqartoq Nuummi umiarsualiviup allilerneqarnissaata aallartinneqarnissaanik kissaateqarnermit pingaartinneqarnerusariaqartoq ikinnerussuteqartut isumaqarput. Taamaattumillu pilersaarutit Assartuinnermut Isumalioqatigiissitamit kaammattuutigineqartut pilersaarutaasinnaasullu allat qanoq tulleriinnilersugaallutik aallartinneqarnissaat Inatsisartunit aalajangiiffigineqartariaqarpoq. Periarfissat tamaasa ilaatillugit naalakkersuinikkut suliaqartut siamasissumik oqallinnerat tunngavigalugu tamanna pisariaqarpoq. Taamaattumillu Nuummi umiarsualiviup allilerneqarnissaanik pilersaarut

taama annertutigisoq maannangaaq aallartinneqarsinnaanngilaq, taamaaliornikkummi Inatsisartut tulleriarinivimmik ingerlatsisinnaanermittut periarfissaat killilerneqassammata. Tamat oqartussaaqataanerannik tunngavik aallaavigalugu tamanna assut eqqarsarnartoqartutut ikinnerussuteqartunit isigineqarpoq, tamannalu tunngavigalugu qinnuteqaat akuersissutigineqarsinnaanani.

Amerlanerussuteqartut naliliinerat naapertorlugu aalajangiisoqarpoq.

Aningaasaqarnermut Ataatsimiititaliap aalajangiinera

Siuliani allasimasutut paasinnillutik Naalakkersuisut inassuteqaataat Aningaasaqarnermut Ataatsimiititaliami amerlanerussuteqartunit **akuersissutigineqarput.**

Aningaasaqarnermut Ataatsimiititaliaq sinnerlugu

Andreas Uldum
Siulittaasup tullia